

Ussa sa verifitgeschan las preoccupaziuns

Societad grischuna dals impressaris da construcziun

DA GION NUTEGN STGIER / ANR

■ **Ils impressaris da construcziun duaian daventar pli activs en la politica e prender in exempel dals purs. Sin il sector da la construcziun auta han els gi il 2015 per 20% damain lavur. Da nov en suprastanza da l'uniun èn vegnids elegids Martin Casutt da Falera e Roland Conrad da Zernez.** Ils impressaris da construcziun dal Signuradi èn stads ospitants da lur collegas ed han organisà la radunanza 2016 a Maiavilla. Bunamain 80 impressaris èn stads da la partida e cunzunt blera prominenzia da la politica e da l'economia. La Societad grischuna dals impressaris da construcziun exista dapi il 1906 e da preschent appartegnan 132 interpresas a l'uniun tetgala. President è *Markus Derungs* da Tavau e mainagestiun da la societad è *Andreas Felix*

lix da Haldenstein. En ses pled da bainvegni ha Markus Derungs cunzunt ditg ch'ils impressaris hajan da prender in exempel dals purs quai che pertutga la lobi en il parlament federal. El ha supplitgà ses collegas da daventar pli activs en la politica communal, regiunala, chantunala e federala. «Sche nus faschain betg politica, lura vegn fatg cun nus politica», ha accentuà il president dals impressaris da construcziun da noss chantun. A las represchentantas ed als represchentants dal Grischun en il parlament federal ha Derungs supplitgà da s'engaschar a favur da l'economia publica quai che pertutga l'immigraziun da massa e cunzunt da refusar la contingentaziun per forzas da lavur da l'exteriur, limitada sin quatter mais. Er quai che pertutga las pretensiuns impertinentas dal sindicat saja da star vinavant attent, ha ditg Derungs.

Avant tschintg onns anc ina svieuta dad ina milliarda francs

Il 2014 era tut en tut stà in bun onn per las firmas da construcziun grischunas. Lavur han ellas gi quel onn per in import da stgars 958 milliuns francs. L'onn 2011 aveva la bransch da construcziun schizunt anc fatg ina svieuta da passa ina milliarda francs. Svieutas da records sajan istorgia, ha ditg Andreas Felix, il mainagestiun da la Societad grischuna dals impressaris da construcziun. Grazia a la blera lavur da construcziun bassa, cun in augment dad 1,5%, han ils impressaris grischuns tuttina gi il 2015 in bun onn da gestiun cun in import da stgars 937 milliuns francs. Sa reducida per bunamain 20% saja la construcziun d'abitaziuns e lavur tar la construcziun auta, ha menziunà Felix. En las regiuns turisticas saja la lavur sin quel sector schizunt sa re-

ducida per vers 60%, ha el accentuà. Sin fundament da quella realitad sajan la concurrenza da pretschs e l'interess da vegnir tar lavur in vair cumbat tranter las firmas, punctuescha Felix. En la Val dal Rain grischuna vegnia anc adina bajegià pulit, ha el er anc ditg.

Radund 900 lavurants damain

Grazia a la lavur dal maun public (chantun e vischnancas) ed a la blera lavur da construcziun bassa possian bleras firmas sa tegnair sur l'aua, ha menziunà Felix. 50% da la lavur deriva dal maun public e quai saja tuttina blier, ha accentuà il mainagestiun da la Societad grischuna dals impressaris da construcziun. Sa reduci è suenter l'iniziativa da las abitaziuns secundaras er il dumber dals lavurants da las impresas da construcziun en noss chantun. Avevan ellas anc il 2011

radund 5700 emploiad èn quai stads il davos onn 900 lavurants damain. La bransch da construcziun è dal remiment ina impurtanta pitga da l'economia grischuna cun ina summa da pajas da 350 milliuns francs. In fatg plaschavel saja che mintg'onn termineschian en noss chantun 60 miraders e construiders da vias lur emprendissadi en il Grischun, ha ditg Felix tut cuntent. Fatg curaschi als impressaris da construcziun ha *Mario Cavigelli*, il cusseglier guvernativ e schef dal departament da construcziun. Er en l'avegnir vegnia il chantun ad investir per onn vers 151 milliuns francs per vias principalas e 37 milliuns per vias lateralas. Da nov en suprastanza da l'uniun èn vegnids elegids *Martin Casutt* da Falera e *Roland Conrad* da Zernez. Demissionà aveva *René Hohenegger* da Zernez.



Andreas Felix, il mainagestiun da la societad, il referent Jens Korte e Markus Derungs, il president dals impressaris da construcziun da noss chantun (da san.).



Ils dus novs suprastants da la Societad grischuna dals impressaris da construcziun Roland Conrad (dretg) e Martin Casutt.

FOTOS B. DÖNZ